

# NOS MINISTERIO DI REINO

## NOVEMBER 2012

### SIMAN DI 12 DI NOVEMBER

Cantica 66 y Oracion

#### ❑ Estudio di Bibel di Congregacion:

/v cap. 1 §10-18, cuadro na pag. 13 (30 min.)

#### ❑ Scol di Ministerio Teocratico:

**Lesamento di Bibel:** Amos 1-9 (10 min.)

**Num. 1:** Amos 3:1-15 (4 min. of menos)

**Num. 2:** "Testament Nobo" Tambe Ta Papia di un Futuro Paradijs Riba Tera, of Ta "Testament Bieu" So?—rs-S pag. 278 §1—pag. 279 §1 (5 min.)

**Num. 3:** Con un Bon Comprondemento di Salmo 51:17 Por Beneficia Nos? (5 min.)

#### ❑ Reunion di Sirbishi:

Cantica 68

**10 min:** Si un Hende Bisa: 'Boso No Ta Kere den Hesus.' Discurso cu participacion basa riba e buki *Rasonamento*, na Spaño, pagina 216, paragraf 1-3. Tene un demostacion cortico.

**10 min:** Kico Nos Ta Siña for di Marco 1: 16-20? Discurso cu participacion. Laga un ruman lesa e texto. Despues, analisa con e relato aki por yuda nos den sirbishi.

**10 min:** "Satisfecho cu e Fruta di Tur Nos Trabou." Pregunta y contesta.

Cantica 98 y Oracion

### Satisfecho cu e Fruta di Tur Nos Trabou

<sup>1</sup> Dios a crea hende cu e capacidad di "mira e bon cu tin den tur su trabou." (Ecl. 3:13) Pesey, ora nos sirbishi no duna e resultado cu nos ta desea, nos por sinto nos desanima y por perde un poco di nos entusiasmo. Kico por yuda nos keda cu un actitud positivo?

#### <sup>2</sup> Keda cu un Expectativa Realistico:

1. Kico por pone nos perde un poco di nos entusiasmo?
2. Pakico nos mester keda cu un expectativa realistico?

Aunke masha tiki hende a acepta Jesus su mensahe, su predicacion sin duda tabatin exito. (Juan 17:4) Den e ilustracion di e sembrado, Jesus a profetisa cu mayoria di hende lo no acepta e mensahe di Reino cu el a compara cu simia. (Mat. 13:3-8, 18-22) A pesar di esey, nos esfuersonan diligente ta logra hopi.

<sup>3</sup> **Con Nos Ta Duna Hopi Fruta?** Segun e ilustracion di e sembrado, hende cu acepta e mensahe lo "duna fruta." (Mat. 13:23) Ora un palo di trigo crece y madura, e no ta produci un otro palo di *trigo*, sino mas bien e ta produci *simia* nobo. Asina tambe, e fruta cu un cristian ta produci no necesariamente ta un discipel nobo, sino e cantidad di simia di Reino cu e ta sembra cada bes cu e predica. E "bon" cu nos ta logra cu nos sembramento ta duna nos satisfaccion, sea cu hende scucha of no. Nos predicacion ta contribui na santificacion di e nombre di Jehova. (Isa. 43:10-12; Mat. 6:9) Y ta un privilegio pa ta companero di trabou di Dios. (1 Cor. 3:9) Ademas, Jehova ta keda contento ora nos ofrec'e "e fruta di nos lipnan." —Heb. 13:15, 16.

<sup>4</sup> Nos mester bisa tambe cu no ta semper nos ta mira e resultado di tur nos trabou. Kisas algun di e hendenan cu a scucha Jesus su mensahe no a bira su discipel mientras e tabata riba tera ainda. Mescos por pasa cu e simia di Reino cu nos sembra den curason di un persona. Kisas e simia ta tarda pa saca raiz y crece, pero cu tempo e persona por bira un Testigo sin cu nos mes sa. Sin duda, nos ta logra hopi cos bon den sirbishi. Pesey, laga nos "sigui duna hopi fruta" y demostra cu nos ta discipel di Jesus.—Juan 15:8.

3. Con nos por "duna fruta" hasta si ta poco hende so acepta e mensahe cu nos ta predica?
4. Ki fruta nos por produci sin cu nos mes sa?

## SIMAN DI 19 DI NOVEMBER

Cantica 81 y Oracion

### Estudio di Bijbel di Congregacion:

/v cap. 2 §1-11 (30 min.)

### Scol di Ministerio Teocratico:

**Lesamento di Bijbel:** Abdias 1-Yonas 4 (10 min.)

**Num. 1:** Jonas 2:1-10 (4 min. of menos)

**Num. 2:** Con Adoracion Berdadero Ta Uni Hende di Diferente Background? —Sal. 133:1 (5 min.)

**Num. 3:** Dicon e "Paradijs" Cu Lucas 23:43 Ta Papia di Dje No Por Ta Parti di Hades ni di Cielo?—rs-S pag. 279 §2—pag. 280 §1 (5 min.)

### Reunion di Sirbishi:

Cantica 95

**15 min:** Jehova Ta Bendiciona Esnan Cu Ta Yuda Caminda Tin Mas Necesidad.

Discurso cu participacion basa riba e Anuario 2012, na Spaño, pagina 114, paragraf 1, te cu pagina 116, paragraf 1; pagina 153, paragraf 1-3, y pagina 169, paragraf 2, te cu pagina 171, paragraf 3. Pidi esnan presente pa commenta riba loke nan a siña for di e experencianan aki.

**15 min:** "No Pensa Cu Bo Ta Incapas."

Pregunta y contesta. Entrevista brevemente un publicador cu no tin hopi scol of cu ta timido pero cu a pesar di esey a conduci estudio di Bijbel cu otro hende.

Cantica 26 y Oracion

## No Pensa Cu Bo Ta Incapas

<sup>1</sup> Bo tin miedo di ofrece un estudio di Bijbel pasobra bo ta sinti cu bo no ta capaz pa conduci un estudio? Algun sirbidor fiel di pasado, manera Moises y Jeremias, també a sinti cu nan no tabata capaz pa cumpli cu nan asignacion. (Exo. 3:10, 11; 4:10; Jer. 1:4-6) Pues, e sentimento ey ta masha normal. Pero con nos por venc'e?

1. Dicon algun publicador tin miedo di ofrece estudio di Bijbel?

<sup>2</sup> Ta bon pa nos corda cu Jehova lo no pidi nos haci algo cu nos no por haci. (Sal. 103:14) Pues, e encargo cu el a duna nos di "haci hende discipel" y "siña nan" ta algo cu nos por cumpli cu ne. (Mat. 28:19, 20) Esaki no ta un privilegio solamente pa e publicadornan mas capaz of cu mas experiencia. (1 Cor. 1:26, 27) Pesey nos no mester limita nos na predica di cas pa cas y laga e trabou di conduci estudio di Bijbel pa otronan.

<sup>3</sup> **Jehova Ta Capacita Nos:** Jehova ta esun cu ta capacita nos pa haci discipel. (2 Cor. 3:5) Pa medio di su organizacion e ta siña nos berdadnan di Bijbel cu ni e hendenan bon siña di e mundo aki no conoce. (1 Cor. 2:7, 8) El a percura pa nos haya den su Palabra e diferente metodonan di siñanza cu Hesus, e Gran Maestro, a uza. Y continuamente nos ta haya entrenamiento den congregacion. Ademas, Jehova a duna nos e hermentnan cu nos tin mester pa conduci estudio di Bijbel. Un di nan ta e buki *Bijbel Ta Siña* cu ta splica e berdad na un manera logico y facil pa comprende. Pues, no ta dje dificil ey pa conduci estudio di Bijbel.

<sup>4</sup> Cu yudansa di Jehova, tanto Moises como Jeremias a cumpli cu nan asignacion. (Exo. 4:11, 12; Jer. 1:7, 8) Pesey, laga nos tambe pidi Jehova yuda nos. De echo, ora nos ta conduci un estudio di Bijbel, nos ta siñando hende e berdad tocante Jehova, y esey sigur ta algo agradabel den Su bista. (1 Juan 3:22) Pesey, pone e meta pa ofrece y cuminsa estudio di Bijbel. Lo bo disfruta di dje y lo bo haya hopi bendicion.

2. Dicon nos no mester limita nos na predica di cas pa cas y laga e trabou di conduci estudio di Bijbel pa otronan?
3. Con Jehova ta capacita nos pa conduci estudio di Bijbel?
4. Kico ta duna nos e confianza cu Jehova lo yuda nos?

## **SIMAN DI 26 DI NOVEMBER**

Cantica 62 y Oracion

### **□ Estudio di Bijbel di Congregacion:**

/v cap. 2 §12-21, cuadro na pag. 24  
(30 min.)

### **□ Scol di Ministerio Teocratico:**

**Lesamento di Bijbel:** Mikeas 1-7  
(10 min.)

**Num. 1:** Mikeas 3:1-12 (4 min. of menos)

**Num. 2:** Kico Ta Indica Cu e Paradijs  
Mencionna na Lucas 23:43 Lo Ta Riba Tera?  
—rs-S pag. 280 §2—pag. 281 §3 (5 min.)

**Num. 3:** Con Nos Por Sa Cu Jehova Ta  
Esun Cu Ta Scucha Tur Oracion?—1 Juan  
5:14 (5 min.)

### **□ Reunion di Sirbishi:**

Cantica 56

**5 min:** Cuminsa un Estudio di Bijbel

**Riba e Prome Diasabra.** Uza e sugerencia  
na pagina 4 pa demostra con por cuminsa  
un estudio di Bijbel riba e prome diasabra  
di december. Anima tur publicador pa  
participa.

**10 min:** Loke Nan Tabatin di Mas A Compensa Necesidad di Otronan. Discurso na  
encargo di un anciano basa riba *La Atalaya* di 15 di november 2012, pagina 8-9.

**15 min:** "No Laga Bo Programa Druk Stroba Bo." Pregunta y contesta. Entrevisita brevemente un publicador cu a conduci estudio di Bijbel a pesar di tin un programa druk.

Cantica 73 y Oracion

## **No Laga Bo Programa Druk Stroba Bo**

<sup>1</sup> Algun publicador cu ta hopi ocupa ta vacila pa ofrece un estudio di Bijbel. Pa bo conduci un estudio di Bijbel bo mester tin tempo. Bo tin cu prepara, bay studia cu e persona y yud'e vence su probleman personal. Apostel Pablo a bisa

1. Dicon algun publicador ta vacila pa ofrece estudio di Bijbel?

cu el a comparti su alma pa yuda e hendenan na Tesalonica siña conoce Jehova. (1 Tes. 2:7, 8) Pero con nos por conduci un estudio hasta si nos tin un programa hopi druk?

<sup>2</sup> **Saca Tempo pa Sirbi Jehova:** Ta berdad cu nos tin cu saca tempo pa sirbi Jehova. Tur siman nos ta asisti na nos reunionnan, sali den sirbishi, lesa Bijbel y haci oracion. Un persona casa, maske e ta hopi ocupa, gustosamente ta saca tempo pa dedica na su esposo of esposa. Nos cu ta stima Jehova mester ta hasta mas contento ainda pa uza nos tempo pa ador'e. (Efe. 5:15-17; 1 Juan 5:3) De echo, Hesus a bisa cu un parti importante di nos adoracion ta e trabou di haci discipel. (Mat. 28:19, 20) Ora nos medita riba e punto ey, nos lo sinti nos mas motiva pa cumpli cu e responsabilidad di conduci un estudio di Bijbel.

<sup>3</sup> Pero kico nos por haci si trabou, maleza cronico of asignacion teocratico ta stroba nos di bay un estudio? Den e casonan ey algun publicador sa conduci nan estudio di Bijbel via telefon of computer. Esnan cu tin un maleza cronico ta pidi e estudiante pa bin studia na nan cas. Algun ta palabra cu publicador confiable pa percura pa e estudiante ora cu nan mes no por bay studia cu ne.

<sup>4</sup> Pablo a sinti hopi goso ora el a duna di su tempo y energia pa siña otronan e berdad. (Echo. 20:35) Ora el a mira fruta di su trabou na Tesalonica, el a gradici Jehova pa esey. (1 Tes. 1:2) Nos tambe por haya hopi goso y satisfaccion den sirbishi si nos no laga nos bida druk stroba nos di conduci estudio di Bijbel.

2. Con nos amor pa Jehova lo motiva nos pa uza nos tempo?
3. Si debi na algun circunstancia nos haya nos stroba, kico nos por haci pa sigui cu un estudio di Bijbel?
4. Ki bendicion nos ta ricibi ora nos ta conduci estudio di Bijbel?

## SIMAN DI 3 DI DECEMBER

Cantica 128 y Oracion

### □ Estudio di Bijbel di Congregacion:

Iv cap. 3 §1-7, cuadro na pag. 29 (30 min.)

### □ Scol di Ministerio Teocratico:

**Lesamento di Bijbel:** Nahum 1–Habacuk 3 (10 min.)

**Num. 1:** Habacuk 2:1-14 (4 min. of menos)

**Num. 2:** Dicon Nos Mester Papia e Berdad cu Conviccion?—2 Tim. 1:7, 8 (5 min.)

**Num. 3:** Con Cualquier Un di Nos Por Haya Berdadero Conocemento y Sabiduria?—rs-S pag. 170 §3–pag. 171 §2 (5 min.)

### □ Reunion di Sribishi:

Cantica 106

**10 min:** Algun Sugerencia pa Ofrece Revisa den December. Discurso cu participacion. Splica den 30 pa 60 seconde dicon e hendenan den territorio lo haya e revistanan aki interesante. Despues, pidi esnan presente sugerir preguntas asina por capta atencion di e hendenan y tambe ki texto nan por lesa relaciona cu e articulanon di portada di *E Toren di Vigilancia*. Haci mescos cu e articulanon di portada di *:Despertad!* y, si tempo permiti, inclui un otro articulo for di un di e revistanan. Tene un demostracion con pa ofrece cada revista.

**10 min:** Necesidad local.

**10 min:** Experencianan cu Tratado. Discurso cu participacion na encargo di e superintendente di sribishi. Pidi esnan presente pa conta ki experencia nan tabatin ora nan a ofrece tratado durante november. Laga dos publicador cu tabatin exito demostra con nan a presenta e tratadonan di cas pa cas.

Cantica 96 y Oracion

## Anuncio

### ■ Oferta di literatura pa november y december:

Uza e tratado: *Bo Kier Haya Sa e Berdad?* Si e persona ta interesa, mustre con ta studia Bijbel for di e buki *Bijbel Ta Siña* of e foyeto *Scucha Dios of Scucha Dios y Biba pa Semper*. **Januari y februari:** Por uza un di e foyetonan di 32 pagina cu e congregacion tin den stock cu hende den bo territorio kisas lo haya interesante. Ora haci rebishita, introduci e buki *Bijbel Ta Siña* of, dependiendo di e necesidad di e persona, e foyeto *Scucha Dios of Scucha Dios y Biba pa Semper*, y purba cuminsa un estudio di Bijbel.

■ Tur publicador cu no a yena nan tarheta di DPA (documento duradero di apoderacion medico) ain-

da ta ser conseha pa haci esey. E tarheta di DPA aki ta proteha bo derecho di nenga transfusion di sanger. Ancianonan lo duna yudansa personal si esey ta necesario.—Wak e suplemento di *Nos Ministerio di Reino* di november 2006.

■ Ora ta manda donacion pa obra mundial na sucursal, mester traha e cheque na nomber di "Watch Tower." Y manda esaki na e adres di sucursal, esta, Seroe Loraweg 142 A, PO Box 4708, Curaçao.

## Algun Sugerencia

### Pa Cuminsa Estudio di Bijbel Riba e Prome Diasabra di December

"Casi tur hende ta interesa den un bon go-bierno. Ki tipo di gobierno bo ta kere lo por solucionar hende su problemanan? [Permiti e persona contesta.] Ripara kico e revista aki ta bisa." Duna e persona *E Toren di Vigilancia* di 1 di december y analisa hunto cu ne e informacion cu tin bou di e prome pregunta na pagina 10 y lesa por lo menos un di e textonan. Ofrec'e e revista y traha un afspraak pa considera e siguiente pregunta.

### E TOREN DI VIGILANCIA 1 di December ANUNCIANDO REINO DI JEHOVA DIOS

"Nos lo ta contento pa sa bo opinion tocante lo siguiente. Si bo por haci Dios un pregunta, kico lo bo puntr'e? [Permiti e persona contesta.] Hesus a bisa cu ta bon pa busca contesta pa nos preguntanan. [Lesa Mateo 7:7.] Den e revista aki bo ta haya e contesta cu Bijbel ta duna pa e tres preguntanan aki." Mustre e preguntanan abou na pagina 3.

### :Despertad! ® December

"Awe ta notabel cu hopi hende ta bou di stress y ta perde pasenshi masha lihe. Bo també a ripara esey? [Permiti e persona contesta.] Tin hende ta kere cu nos ta biba den e tempinan dificil cu 2 Timoteo 3:1 ta papia di dje. [Les'e.] E revista aki ta splica dicon no ta bon pa perde pasenshi y ta duna algun sugerencia con pa mustre mas pasenshi."

### Logronan Sobresaliente di Juli

Isla	Pio. Spec.	Pio. Reg.	Pio. Aux.	Publ.	TOTAL
<b>Aruba</b>	4	49	27	797	877
<b>Boneiro</b>	5	5	2	90	102
<b>Corsou</b>	4	138	33	1.684	1.859

Corsou tabatin un maximo nobo di 1.859 publicador.